

SOALAN NO.: 35

PEMBERITAHUAN PERTANYAAN DEWAN RAKYAT

PERTANYAAN : LISAN

DARIPADA : YBHG. DATO' SRI BUNG MOKHTAR BIN RADIN

TARIKH : 14 NOVEMBER 2017 [SELASA]

SOALAN :

Dato' Sri Bung Mokhtar Bin Radin minta **MENTERI PERUSAHAAN PERLADANGAN DAN KOMODITI** menyatakan apakah perancangan pihak Kementerian dalam memulihkan harga komoditi yang tidak menentu dan apakah inisiatif yang disediakan bagi membantu pengusaha-pengusaha kecil dan sederhana. Apakah usaha-usaha yang telah dibuat dalam memastikan jurang perbezaan harga komoditi di Semenanjung Malaysia dan Sabah dapat diminimumkan.

JAWAPAN :

Tuan Yang Di-Pertua,

Naik turun harga tanaman komoditi negara seperti sawit, getah, koko dan lada dipengaruhi oleh permintaan pasaran di peringkat antarabangsa. Lazimnya, permintaan pasaran yang tinggi dan berterusan akan dapat menstabilkan harga komoditi tempatan. Oleh itu, Kementerian ini sentiasa berusaha untuk mengukuhkan dan meningkatkan permintaan terhadap produk-produk komoditi negara di pasaran global. Melalui pendekatan ini, kesan naik turun harga ke atas pengusaha-pengusaha komoditi lebih-lebih lagi golongan pekebun kecil akan dapat dikurangkan.

Bagi memastikan produk-produk komoditi negara terus mendapat permintaan tinggi di pasaran antarabangsa, Kementerian mengambil langkah-langkah seperti berikut:

- (i) mempelbagaikan penghasilan produk-produk nilai tambah di peringkat hiliran untuk meningkatkan permintaan ke atas hasil tanaman komoditi tempatan;
- (ii) menggiatkan penyelidikan dan pembangunan (R&D) bagi menghasilkan benih tanaman klon baharu yang lebih bermutu serta produktif, input-input pertanian seperti baja dan racun yang lebih berkesan serta mesra alam, dan pada masa yang sama, memperkenalkan produk-produk hiliran baharu berdasarkan komoditi yang boleh dipasarkan di peringkat global;
- (iii) meningkatkan kaedah pengurusan dan penyelenggaraan ladang dengan lebih berkesan dan kos efektif melalui *good agricultural practices* (GAP) dan pensijilan seperti *Malaysia Sustainable Palm Oil* (MSPO) yang boleh meningkatkan hasil tuaian dan mengurangkan kos pengeluaran tanaman komoditi;

- (iv) menyediakan pelbagai bantuan dan insentif untuk mengurangkan beban kos awalan dan kos operasi pengusaha tanaman komoditi;
- (v) mempromosi dan memperkuatkan kehadiran produk-produk komoditi negara melalui misi teknikal dan ekonomi supaya terus mendapat tempat dan permintaan di peringkat global; dan
- (vi) menjalinkan kerjasama dengan negara-negara pengeluar komoditi yang lain di bawah kerangka kerjasama antarabangsa seperti *International Tripartite Rubber Council (ITRC)* bagi memperkuatkan harga getah, *Council of Palm Oil Producer Countries (CPOPC)* bagi sawit dan *International Pepper Community (IPC)* bagi lada.

Tuan Yang Di-Pertua,

Penentuan harga komoditi di peringkat *farm gate* di Sabah dipengaruhi oleh beberapa faktor seperti cukai jualan oleh Kerajaan Negeri, kos pemprosesan, kos pengangkutan dan permintaan oleh peraih-peraih tempatan. Faktor-faktor ini menyebabkan harga tanaman komoditi di negeri Sabah sedikit rendah daripada di Semenanjung Malaysia. Untuk membantu para pekebun kecil di Sabah terus menikmati pulangan yang baik, pelbagai bantuan dan insentif disediakan untuk pekebun kecil meningkatkan hasil pengeluaran dan produktiviti komoditi masing-masing. Tambahan lagi, bantuan Kerajaan untuk membina jalan-jalan ladang dan akan dapat mengurangkan kos pengangkutan. Pengurangan kos ini dan penghasilan tanaman yang banyak adalah antara usaha untuk mengimbangi perbezaan harga komoditi di negeri Sabah.

Sekian, terima kasih.